

摘藻堂四庫全書薈要

集部

欽定四庫全書薈要卷一萬五千二百七十二

集部

雞肋集卷五

宋 晁補之 撰

古詩

視田五首贈八弟無斃

河流之所濡一斛泥數斗我莊當水窮乃比石田瘦尚
無東陵瓜況有南山豆天雨不可期且復鞭牛後

蘓秦不願印迺在二頃田東臯五十畝力薄荆杞填擇

高種苜宿不溼牛口涎拙計安足為朝徃而莫旋

薄遊廢家務待子營糗糧莊奴不入租報我田久荒凌
矜馬到門碑兀牛卧場立苗蒼耳根此策殊未長

家世不為農長安有大第官糧弗充口萬里聊自庇一
從學聱牙世事百色廢賣牛姑補屋歲晚霜雪至

居貧廢文字銚鑄學苦耕怪子獨伶俜久與地力爭苦
耕又不時孤虺日縱橫高原一釋耒歎息心怍怍

即事一首次韵祝朝奉十一丈

平生交游情獨處不可乍那為一馬飲濁水噴百馬弦
歌高樓上但恨知者寡丈人遺世心口語儻能借不然
抱幽璞終歲裹幙屨坐令青蠅繁暫出刑兩踝儒冠成
自誤歸去無屋瓦賴逢里中賢築室各瀟洒及時秫麥
賤樽酒得同把安能効乾沒肩與市人亞居然邑里號
曾墨為還駕况在竈與間欲恥王孫賈東方錢二百得
米稚啼嗷嘲笑坐窮辰無肉飽伏假尚聞剝啄聲聊復
屣屐迓子常妙工詩蘓李掩曹謝有時醉醜醜大笑翻

盞罍倒床鼻息惡喚起對殘爈復古志尚竒衆競方獨
暇捫蝨與人言豈不逢譴訝崇朝潔腹坐徃徃食旁舍
子固業少成議論婉風雅嘗聞莊生說乃慕巨魚化平
居似晏子志念能自下而我獨迂踈通人所譏罵正賴
觴詠中得意自陶寫留連接清晤欲起不能罷是時春
雨餘桑密鳩鳴野城隅園圃近款段亦時跨便恐百卉
闌晚晚侵朱夏人生形骸累未免俗情詐此理豈外求
猶煩詹尹卦清風穆然在如渴啗甘蔗況我自散材谷

口躬耕者去年秋不在匏瓠緣庭架低回迫榮利妻子
憐王霸橫經亦彊顏已取或人捨但慮宰我愚松柏談
三社翛然一室內黃卷開佳話尺璧競寸陰寧復當論
價吟哦愁肝腎蟋蟀吊長夜鄙俚頗近情持用自悲詫
功名與道義熊掌偕魚炙二事良難兼夫子賢點也

謁岱祠即事

澤南三百里極望橫天雲雲端色凝黛諦視初可分崢
嶸介丘像瀕洞元氣屯頃刻有變化慘澹殊明昏天行

帝出震其位生物元不周債西北川乃東南奔寧知六
鰲死竟使二山淪不有是難傾孰維大塊根嘗聞周官
說實惟天帝孫神靈所鎮守民物斯茫存幽明昭一理
有道惟常尊不覺下馬拜僮奴亦蹲循迺知正直理足
使冥頑敦三王有損益商人所尊神明法或不懼夜行
安得遂以此輔世教庶幾驅驚民莫宿太平驛不眠慮
絲棼明朝好天色萬象開胚渾勢橫恒碣盡支感齊魯
蹲五色冒日觀一握通帝閣恢拓下推雌青蒼上氤氳

泉石競沮如煙嵐互紛綸高舉躡風海深蹠蹈火輪濤
波卷堆阜一一溟渤吞棊枰視井邑七箸藏松椿碧瓦
峙雙闕紅牆繚長圍願瞻巖閔客內滌邪垢魂賜臣登
絕頂一覽神秀原萬壑射窈窕三壇直嶺嶠莽不覩項
領何能窮胫跟稍稍指鳧繹依依數亭云松列大夫爵
羸識將軍墳瑣屑澗花麗霏微崖藥黨廣大良有以竒
險安足論瑰詭有形上頽然德彌惇得無希夷子傲世
逃深秦亦有黃冠士相對如麀鹿磨此曹啣草木語道良

未聞解榻坐中觀洗心馳大鈞形氣要得一不然隨物泯
是事亦姑置幽尋聊可勤初疑無字碑瑩潔誰敢文又
怪玉女井高絕何由齋俯穿鬪仙巖鳥下天壁垠側度
五賢堂熊經背逡巡劔石危數履女蘿柔屢捫揮斥八
極遠風來袂軒軒寥廓自無梯猶疑天可賓陰谷不敢
視恐落魑魅羣安得遂獨徃身如黃鵠翻周流遍五嶽
採掇芝英繁即欲憩圓嶠或當止崑崙衆真迎我語一
笑顏玉溫是中差可樂子胡戀塵樊荅此太遺物身閒

猶事君重華迹已遠秦漢事方煩成功屬吾宋五禮垂
後昆皇帝二載春臣備太史負紬繹自帝典頗識康哉
言泥金白玉字願頌無前勳有志類韓愈無書愧文園
臣髮將雪素臣心猶日暎今此在林藪跳身同攫猿徒
觀衆山小愁絕下天門

遊信州南巖

南巖夫何為山作天倚蓋山南豁山腹飛頂覆其外初
如鵬將翔膺擊羣麓背乍似海大魚呀口噏而嘖當空

橫廣頽架屋喉舌內仰窺駭憑凌俯進愁壓墜嘗聆釋
氏說仰覆各世界千間未可著五畝良不隘清冷氣射
人熱惱從此潰崖奔木踈瘦谷遠鳥幽怪問僧何年居
投老四五輩問客何人來官滿或一再而予與二子高
興偶相戒松舟下清江毛髮數鰕蟹藍輿上峻嶺幢節
望杉檜李侯勛門曹文采山作繪趙君儒林孫嫖美蘭
結佩不為城郭遊繼月此于邁寧知老逾拙意在精賞
退得居溪南山食飲與山對夔魑入奧突雲雨出巾櫳

古人戒賤目慣覩誰復貴顧此誠未逢欣然與心會彭
湖兩崖感泉作一線需禪月古臺空靈山自明晦搜竒
獲三勝趣嬾同一慨但憂久聱牙尚喜無蒂芥平生所
驅使詩酒俱好在天涯得吾侶物外從所快便欲登赤
城一觀天宇大

北京水後往棣州試進士

晡時北京城行李上客槎二更無人聲騎馬黃河沙誤
緣柳灘中尋炬知田家道有轉徙人襁負依丘麻雞鳴

不安枕髮鬢墟里斜秋瓜抱子母蕎麥亦已華賴茲野
物登爾輩生有涯夜宿冠氏驛旅衾魂夢嘉明發縈長
坂晚開堂邑衙秋陽此方熾流汗霑巾紗處陰甘吾願
聊逸豈在多有風東北來慘慘飛雨加頃時異晦明稍
矚天表霞僕夫為我言塗梗絕行車且還解吾褚中林
侶羣鴉詩書維永夕蚤作從復賒豈不有王事奈此僕
夫何

次韵王宗正定國與蘓翰林先生黃拔書魯直唱

和

東國寬市征西山休騎屯時清詩人喜洗濯出佳言淵
源蘓夫子河入莆菖翻軌轍按書君駕驂盜驪奔後來
得濬沖它人孰窺藩壁言余學禮素婦祭盛於盆不應
麾門牆尚許酌衢樽夢天九門開燦然列星繁羣公顧
我喜顏若白璧溫赤城何足躡愁絕永嘉孫

次韵孔著作常父館中喜雪

冬早及茲雪都人銷百憂牆根有宿草餘綠尚去秋新

陽解薄冰大潤升介丘夜聞窗響紗高雲正綢繆明日
天津望寒花翳川流宮中聖人喜癘氣一夕收史占上
日祥知欲遍九州敢任肉食謀官閒欣歲休雖無山陰
船窮巷窘若囚却幸葛翁來湯餅有麥牟見神仙傳孔戾金
閨彥平昔慕追遊延閣排霄起登臨忘我愁何當聯轡
鑲城苑佳氣浮春郊日可望桑野聽行謳

次韵張著作文潛休日不出二首

張侯經濟術見遇未容心揚子執戟老蔣生開徑深予

亦拙造請素懷愛園林閉門烏雀喜朝日上駸駸
文史平昔契淮山別離心省中竝日直天上青春深買
屋近城塢往來成竹林詩模黃著作吾亦意駸駸

次韵文潛病中作時方求補外

貧爐初著灰濁酒寒不温鄰張病未來獨負南窗暄昨
日往過之歡喜能兩餐醞醞洪然解愧無枚乘言祝君
抱虛一邪氣襲無門今晨有起色迎笑眉宇軒扶掖兩
男兒總州佳弟昆遣誦寄我詩妙可白玉刊平生俱豪

氣見酒渴驥奔賜休常苦稀晨謁良不閒約君向南邦
勿厭敲扑諠公餘未忘飲何必酌十分時平但行樂卧
治安足論琵琶五十面雷雨出鷓絃

再次韵文潛病起

淮浦見之子春風初策名頗訝謫仙人有籍白玉京晚
遇廣文直老交心愈傾同升芸香府偶坐華髮生斯人
自龍性意變難章程嗜酒不疵吝身如秋葉輕自言士
處世何必冰雪清交游滿臺省毀譽半王城不肯効俯

仰畏高梅鰥惇常思老伊頴紫蠓羞吳杭我輒抵掌和
音同磬隨笙小人奉慈親皆嘗小人羹寒衣婦補綻學
績女娉婷日欲江海去心期楊柳青衆木構大厦豫章
倚孤撐如子足醫國可容移疾行丹書紫皇告玉篆五
嶽形何必陶隱居吞霞養純精訪道自素約諧心期莫
齡但恐牽俗緣志大功不成息交屏妻子此語不須驚

雞肋集卷五

欽定四庫全書薈要卷一萬五千二百七十三

集部

雞肋集卷六

宋 晁補之 撰

古詩

玉溪歸逢甥李相如汴中

蠻鄉俟天形畏蠹復憚暑夢甥來萬里竹響風動宇如
今真似夢相對別恨吐平生窘執轡白面力如虎誰令
斗指日江使墮漁罟桃僵李為仆遺珮滿江渚常憂抱

石死無復腳踏土那知徼時願起廢遇明主曠調已遠
跡未用矜杜舉但憂世議隘亡弓不亡楚吾甥學孔子
况乃父母魯如聞四門闢未信遡洄阻上書閔魃旱膏
以神靈雨北海自有人高丘豈無女爾壯觀爾能吾歸
固吾所期甥二兒上餘子不足數何以喻吾心酌此湘

吳醕

送學生李公裕兄弟赴省集

閉門圍火談開戶雪一尺黃昏具盃酒知君遠行役君

家三兄弟頗謂各無敵容父學知方大道通四驛吉父
尤頡頏天池觀水擊仁父少而竒乃是夜光璧李侯有
此子便可卧安席家居藥與餌聊以止過客豈無一束
芻空谷不可食宵人操寵利徒手捕蜴蜥公等寧復然
烏黑鵠自白屠龍業有用未厭所從僻富貴念昔時城
東雪中跡

次韵太學舒博士堯文示同志

北門望瀛關一葦初莫渡

項官大名堯文在高陽

儒宮連案几會

合豈非數蟬鳴幾何時庭菊下白露念當慰佳節觴酌
美無度不然坐歲晚流景急飛兔區區人一馬官舍勤
早莫經時枉見贈彌月不能賦竹齋行茗粥寂寞當屢
赴此君安可得霜雪不改故詩如交戰地高處要先據
牛羹君放飴轆鼎吾亦飮顧慙詠伐檀無補餐已素還
家便却埽況乃無戶屨

次韵蘓翰林五日揚州石塔寺烹茶

唐來木蘭寺遺跡今未滅僧鍾朝飴後語出飢客舌今

公食方丈玉茗攄噫嗑當年卧江湖不泣逐臣玦中和
似此茗受水不易節輕塵散羅麩亂乳發甌雪佳辰雜
蘭艾共弔楚纍潔老謙三昧手心得非口訣誰知此間
妙我欲希超絕持誇淮北士湯餅供朝啜

題四弟以道橫軸畫

黃葉滿青山枯蒲靜寒水鳧雁下坡媵牛羊散墟里擔
穫莫來歸兒迎婦窺籬虎頭無骨相田野有餘思

桂漿

暑卧午呀呷蠲煩何所投巖桂割辛芳石蜜滋甘柔沃
以火鼎沸閱之冰井幽三日出深窳明瓊盎黃流冰火
離坎類意比秣麥繆辛甘既兩適不洒亦銷憂中年苦
内熱歲願西風秋寒凉犯所畏發散資爾謀時時以觴
客三獻不一酬緬思湘纍語啜醑終所羞北斗酌此將
違世聊遠遊恐復迷吾往僕悲道阻脩淮南歸來些憭
慄令人愁百壺無此餞夙志慕林丘寧懷小山感不為
桂枝留

送舅氏楊通直令陽穀

人言慎縣宰頗似太丘君
客戶有訓遣司官無訟聞
外家久寂莫舅氏少辛勤
一邑何足道高名誰與羣
西來馬持持冬晚雪紛紛
公朝道由砥孤士跡如雲
過門苦地僻下直迫日曛
深泥枉窮巷寒鑪對殘燼
感慨說宣子飄零綴遺文
麟閣窘鉛槧魚山失耕芸
遠情等匏繫歸夢劇絲棼
山東接畿甸陽穀近榆枌
吏昔猛豺虎民如窟鹿麋
君幸逢寬大時庶幾仁惠薰
自笑下士策不殊

野人芹愛民宜百祿本茂實當黃

贈王推官允中

我生譬言天星睨睨但空譽學經羞輪扁常恐老竄句南
游上會稽弱冠肆遠步便當期汗漫如鳥鵲脩羽入宮
又獨晚謠詠遭衆嫖坐令平生交室冷羶不具君公牆
東客清鑒美無度風期山水意千載見此遇定疑丹青
仙方我以癡顧豈繫才自疎閱世真異趣伐柯理無遠
要以一馬喻古人本不死方寸有佳處三年禹河曲日

見車馬渡何知謝剝啄黃土衣易汗無人尚有子獨載
城下路功名喧口實簪組託肺附請看鉗罌滿取躓病
不去脫黏窺本初湏子遺所寓怵迫倦東西林間尚寬
裕

之京師展墓

短轡馭羸馬馳驅曹濟間商飈折勁木蕭瑟道里寒沉
復慕所天惻愴推心肝游子歎時邁慈母憐衣單來時
憑窗哭五妹垂脩鬟季弟主菽粟孺妻爨茅菅悼我無

令人莫奉堂上歡豈無萱草詩終日倚門闌念昔常獨立所聞詩禮難我尚未成人遭罹此憂患歲晏念墳墓
此離百哀攢何時奉靈車辛苦向此還親寡氣力微傍
人祝加餐願言薄志節苟生無形顏

同畢公叔飲城東

西城昔相植桃初兩三紅翩翩鶩長陌春風搖馬鬃後
君歸幾日游絮已濛濛解鞍不待憩相命古原東芍藥
雖俗花狂姿幸時供平生於知己千過不一逢感君欲

開口清洩出霑胸君如陶淵明不為五斗恭胡為青綸
上朱墨紛外蒙棄官能從我短後追田翁銅斗釀秫麥
竹枝弋鳧鴻何必悲無衣緼賡聊御冬九辯太高潔五
噫苦羈窮置此無滑和天情反其中市藥非市名名聞
藥何庸十漿饋五漿猶畏聞者從如何鄴城畔夜夜生
長虹

題李秀才成季負日軒

李自號
天隨子

盧敖遊八極未至北陰墟卒然蒙谷幽覩一竒丈夫淚

注而鳶肩深目玄髭須軒軒迎風舞自得樂有餘見教
默弗言漫然下臂趨教私躡其後若士意不愉曰子亦
何為迷繆至此乎此雖窮荒北尚或逢日烏過是有玄
闕晦墨不可居語竟若欺魄攝身沒空虛始予讀秦記
疑是忽帝徒今聆天隨言乃與夸父俱逐日下虞谷力
窮尚嗟吁陽舒固物理我亦安于子若士獨何氣幽沈
山海隅渾沌死已久人生信多塗

次韵李成季感事

吾廬無餘地文字散堆案雖微清溪鶴著書亦幽玩高
人來何踈午榻動成鼾夢聞足音喜不待搖枕喚居貧
少煙火餽食尚須肝出門兀何之踉蹌從款段吾人古
遺隱鳧足閔同患負日持獻君狐白不肯換商歌叩牛
角長夜安得旦颼颼滿屋風黃葉散投幔楚屈若靈龜
出處思過半所從聊自知何用詹尹算不如天隨生頭
幘終日岸況君擊莊缶一念腸九轉人方卧大室子獨
號其畔寒山來助哭咄爾勿嗟惋

同李主簿叔文飲北莊

蕭條蓐收窮疎樹失穠紺北風動地起雲攬紅日暗李
君邀我游饋款治寒擔相攜二三子歛若符節勘愧非
谷口隱佳會良可暫茅堂兀四壁誰識此意淡古徑無
俗尋陳編有幽瞰一聆君子語梁肉幾厭啗歸來馬河
北寂寞晚舟纜吾生事逃伏優游亦何憾

夏季

夏季百果繁兔葵亦成實獨有野石榴幽花時熠熠

熠非獨好芳榮賴午日翩翩彼白蜨鬢粗采挹睡餘
起對此嘉興亦蕭瑟良非阡陌麗敢競陽春出無言以
成蹊上愧桃李質幸當飽霜餘萬顆富君室

曹州道中二首

天旱久不雨四郊多狂風蕭蕭班馬鳴落日大野中君
子守宮廷至樂聖所同喟予不逢辰足跡道里重
驅馬上高原秋風吹客衣感時有所懷送目鴻雁飛羸
僮惑歧道日莫相際稀愧彼倦翔鳥知還良庶幾

病起呈李縣令希孝

次公惡醒狂得酒要自濁病聞南隣邀不往亦踴躍空
床成展轉假寐風雨惡中虛氣襲逆妄夢時可愕每慙
張隱居凌旦發囊藥曉來天境清日出鳥語樂家人語
南軒青杏已可嚼復云竹齋前堦庇有迸籜欣然欲舉
手紗帽未能著平生李夫子相得懷抱廓何當戒長鬚
夙駕慰寂莫杯杓恐不勝快語聊一噓

贈金堤劉承制景文

漆園說海若稷下談神州長劔堪倚天語大世莫酬少
狂豈其然及此日月流稍知畫足非萬事指顧休夫子
更高識未沫於前修乘流聊復駛得渚正須留蓋有幸
遇魯何能必為周徜徉下澤車驚駭入谷騶對酒尚青
眼吟詩將白頭山陰論往事陳迹詎能收

次韵四弟以道十二弟叔與法王唱和兼示无斲
弟二首

少時勇遊山說山喜動色中年謫南方廬阜得深歷當

時不類謫忘腰帶之適怪人肝鬲異破賊喜折屐只今
竄林下織衣而畊食緬懷茲兩士吾宗氣相得吾春種
桃時子曉尋嵩日似聞黃面子為採烏頭出去年陟岱
宗一士世莫識天門邀之下傾倒意已極斯人與人異
龍虎兩超忽重尋亦無路顛雨石岷圻

吾人伯仲間一語可物色氣自寡所諧窮乃足所歷家
風貌五世不肯適人適意行無險易又跣不著屐文詞
如苦李慘腹人莫食猶矜不傳妙坐恐兒曹得學憐新

又新老奈日復日伯以最恬愉何由採芝出无斲能寡
言猶堪謝前識叔與氣尚豪搢頤視屋極斯文惡表褻
枯魚戒所忽應如魯宮籀藏壁俟其坼

雞肋集卷六

欽定四庫全書薈要卷一萬五千二百七十四

集部

雞肋集卷七

宋 晁補之 撰

古詩

同劉景文登大安閣

劉侯先將軍忠義當代顯
喑啞斥萬夫却走自相踐
西坡坐首鼠勢感不得免
天憐壯士窮有子如此鮮
清時鑄農器文字正須勉
行吟畔牢愁憤悱亦足遣
時來躡

雲梯仰視天宇展下俯河兩涯牛馬細不辨達生匪行
怪未用驚邑犬官閒尚數臨泐澤要清淺

次韻張著作文潛飲王舍人才元家時坐客戶部

李尚書公擇光祿文少卿周翰大理杜少卿君章

黃著作魯直

霜雪埋百花及時鬪春陽城南有高士買屋入花藏經
時不出門為花日日忙我居在何許近止東數坊亦有
佳公子連車換帷裳隔牆蜂蝶誼開戶草木香仙人朱

桃椎髮綠童臉芳此公不可見此畫來遠方竹敬磨麻
塢柳拂轆轤床素兒雖小小亦足侑客觴尚書廊廟具
氣若冰壺涼忘年此賓主吾黨有輝光人生走塵土歲
月顏鬢蒼曷不休沐暇過此薰修房宴坐二十年非癡
實難量

王才元未
四十休官

張侯不出家在家說緣忘尚擬問兩

卿攜肴借紅粧妍歌聽黃子不飲亦清狂

次韻范翰林淳夫送秦主簿覲

高詞自班馬短句亦陰何翰寫無窮已懷山赴壑波深

耕待銍艾療饑乃嘉禾機雲共一時未信來者多老病

愧羣豪魚山臨東阿蘇公門下客事業皆不磨孫寶暫

主簿靈槎會窮河它年九功叙當使睦者歌業虞置牙

羽筦簫復森羅鏞鐘欠一鐸未害大樂和却欲從浮海

珊瑚爛紅柯龍門雖箭駛此志未蹉跎丹沙還黑髮流

景爾則那仇池出一派分江定有沱

事見蘇詩

次韻答秦觀見贈

修身貴日新如草陳葉換請看絃上矢歲月不可玩文

章得蛙釜虎以皮邁難茲事從古然吾黨奚獨惋秦君
好學勇決勝百馬汗宵行委明月屢得按劍盼鄙夫晚
更事前猛窘新悞憐君亦自嘖意滿懷不散誰為傾國
媒尚此瓊英粲期君似椽且無以無人慢

北京學直舍對客

鳥聲落檐間竹色在戶外解屨置几前放杖當椅背默
然仰棟時往與古初會有時遺坐客十問不一對尚因
呼乃覺笑自謝頑昧知非慕遽子事去等蝸蛭一生所

未免飲食與眠睡所以更頽然可樂本非內有心欲何
用橋起則形累賴客同門生曠蕩乃不愧

虛齋

虛齋閉竦牕竹日光耿耿更無司業酒但有廣文冷人
憐出入獨自喜往還省時作苦語詩幽泉汲脩綆

直舍即事

秋雲多重陰凌旦亦可樂虛齋坐亭午寒雨依高閣王
官有憂責霖潦河未落孝先但欲眠不奈弟子謔黃花

迫晚景白露下叢薄獨當慰佳節得酒自斟酌

昨日雪已佳約李令希孝

昨日雪已佳今日雨亦好冰膚解萬木洗濯見枯槁思
君對此坐孤詠廢幽討明日尚相期春禽聽清曉

同文潛送况之諫議十四丈守潞過成季作

午投李同年下馬汗如洗城南迫送客雖懶聊爾出
門繚陂渚白鳥起深葦佛宮橫晚霽窈窕間一水借問
客何人諫垣有直氣吾人浮丘伯聊可與把袂如此邂

金
卷七
迨何得酒亦佳事官閒猶有守旋折窘六轡可憐千紅
蕖的爍姹晚市便當夙駕行秋風如箭駛

送梅校理子明通守杭州

金明池上柳人折一枝春贈子意不淺東游雲外身人
生半刺史朱綬光四鄰此豈經世懷但慰垂白親錢塘
我舊遊頗復識其人不應山水改但恐猿鳥新章臺走
馬客冠蓋盡要津竊祿我自慙便面聊障塵亦思一舟
去共醉西湖濱時平自行樂不為千里尊歸來麒麟上

獻納當及辰

送呂承奉至山從呂龍圖晉伯辟秦州機宜

去日劇奔驥新交非曩圖憐君事業長蔚若頤生鬚表
東海者誰君世有顯儒端委論百揆鞭弭雄千夫二陳
詩禮伯八荀紈綺雛嘗聞達大家可以濟八區功名望
聖世忠孝自吾徒我昔拜秦州詞林炳於菟見謂可與
言鋤荒而破觚剗中不宿穢味道因有腴斯文望若人
顛沛一手扶白頭遠綏邊敗騎安足驅汲黯在朝廷永

金
五
夕
四
八
夕
二
卷
七

絕淮南覩平叔不鬪羌事正今日須今君捩杖屨還向
府中趨問訊不棄捐寄聲亦踈迂何當質疑義賣劍老
樵蘇

曉發樓子莊

曉發樓子莊淮山自茲近春風似惱客浪穩舟不進長
安一回首堤柳千里潤念當整帆席快若冬蟄奮微生
謝拘窘末路嗟鄙吝林花一迎笑岩鳥相借問塵埃改
顏鬢堅白畏緇磷江海慰高情飄蓬自吾分

禮部移竹次韻李員外文叔

東南之美者見伐以直幹豈如此君踈猶作此郎玩此
郎乃在此無乃材亦散平生吉甫頌意鄙枚叔亂坐狂
得此冷對竹頭幘岸尚思殺青書充宇白虎觀恐此愧
子猷還成倚楹歎

文叔有
志史事

次開祖使君韻兼呈端叔大夫聖域長老

神龍異凡馬頭角要須斂邦公七歲時驚耳一語險悟
身非常住風日過河減崢嶸法雲窟跳出有家範金剛

不吐焰已落天魔膽一派感慈中無波寒湛湛是波本
非水無以瓦礫點低枝競聽法草木有情感作解受羣
邪砒砒疑琬琰居然身出定面目本來儼而我久塵勞
見之良內慊周侯老詞句太華聳而黯自說少苦心脩
塗肆窮覽李侯遺世事不琢元無玷文采麗春葩百牘
交千槩顧慙土炭嗜畏疾非羞儉望不見水端譬河還
少貶請佩伯陽言吾非勇於敢

次韻錢濟明贈感慈長老

我聞棲禪人一念超十地云何別影事未免依緣氣譬
如幻男女機廢根隨廢不然怖頭走此病窮三世邦公
師子吼曾使諸天喜廣說無說時俱成甘露味不知室
久如當有天來侍城隅竹塢近梵刹開嚴闕以彼穴中
空清風自來萃我生久更事求愚不求慧清風已說法
不用重宣偈開祖照人姿滄波白蘋際居然九奏妙往
往魚龍戲濟明經世才彫松識寒歲懷寶竟迷邦此豈
非良計名山尋勝士投老終深詣我自所蘄廉蟬葉真

堪蔽

送八弟无穀宰寶應

窮邦迫秋成霖雨厚土溼遭吾上涑水淠沟三峽疾邦
人送之子岸潦飲馬膝淒淒屬方升澹澹驚並集衝湍
順塗路游波滙原隰安知禾黍腐轉覺蛙黽急何由乾
此潦問天借九日蕭蕭荆棘晚疊疊霜霰密之子向南
州銅章宰一邑何須念宋遠古謂跂余及揚舲堤柳盡
把醖淮山入封圻吳楚徼郡縣秦漢襲開門駟僮闕鞞

浦篙帆翕平旦書百函交衢客三揖新湖容鼓鑄甲令
貴綏輯之子寡詞科聞詩不讀律古來學為吏頗自吾
儒出足民與知方求由有政術鞭笞麇鹿駭亦恐日不
給先君卓魯後之子况早立焚香閉閣坐啾耳從漶澌
官忙尚偷閒文字要業岌

和關承議彥遠水樂

上盆五尺高下盆二尺廣咿叻蟻穴間飛瀑一線響關
侯初為此避世挹蕭爽晁子亦欣然閉戶穿瓦盎虛堂

一畝靜純白四隅敞中央渾沌胚條忽所求往鑿竅令
語言豈但一成兩危峯下俯瞰石井黝然仰奔泉決皆
落慘澹陰壑想明珠溢盤盂白露溼塵埃聲音通大道
斷竹自誰賞何曾戛擊闌鉞缶日夜長初疑風隕籜驟
雨來莽蒼乍似酒落槽夜枕聽惚恍鳴禽雜啁哳物鬼
亂肝蠻相依欠林樾見蔽賴帷幌范侯驚側耳李令笑
抵掌張侯助我嬾不憶稅歸鞅雲間余仲弟聊可樂吾
黨中和非外物此理未宜罔相勸戒勿傳名字遍天壤

撞鍾鼎食事老罷不知饗但怪一世狂端如轉車輞能
來解幅巾為子濯泚頽

送君

送君上馬時不道朝鑪煥春風入木心
皮膚發紅綠春風良易莫那得勤行路
且莫望南牕胡蝶飛無數

上馬

上馬笑屬君歸期在十日來時草白芽
歸時青鬱鬱來嗔馬蹄急歸嗔馬蹄緩
人心自如此馬蹄終不變

試院次韻文潛欲知歸期近呈天啓慎思

睂山得張侯心許出一手臨川見蔡子千載慰邂逅
鄧君起南國磊磊看三秀譬如黃鍾陳我尚瓦釜吼欲知
歸期近喚馬牽出廩官壺持餉婦傾寫不漬口千章輸
明堂勿問草澤有羣公自凜凜水鏡照妍醜

栽花招泗州叔父

春園移春栽芽蘗粒大東風日日吹噴吐不暇裹楊
梢青猶未桃萼紅尚可田蔬美已最村醕醇亦頗少年


慕立事幸得能幾箇艱難合歸來茅屋聊共佐

雞肋集卷七

謹案卷五第四頁後五行寥廓自無梯刊本寥訛
廖據楚辭改

卷六第二頁前三行家居藥與餌刊本藥訛樂據
宋詩鈔改





總校官庶吉士臣張能照

校對官編修臣方燁

謄錄貢生臣郭棣泰

謄錄監生臣倪時慶

欽定四庫全書薈要

集部

雞肋集卷八至
十一

詳校官助教臣謝登雋



欽定四庫全書薈要卷一萬五千二百七十五

集部

雞肋集卷八

宋 晁補之 撰



古詩

次韻閻秀才漢臣食兔

兔誠中山族中古稍分裂唐虞用大牲雖有目未嘗醜
孫能飛仙飄忽天漢決不逢易牙試厥胄幾泯滅羿弧
殞陽烏曾不弋在穴王良馬慢忌撲握幾奔掣初遭剋

赴子鼎飪飲毛血中逢宋鵲窘饑吻啄原雪叔世削格
多星迸失行列蹄窮不得逸如鼠限高闌應憐蚌潛水
暴腹想江月脣亡欲誰語竟死猶結舌肩尻弱易解狼
藉腥尺鐵抽毫置筠管復苦蠹魚齧論功在冊府微物
推爾傑剡藤光奪縑抄記良瑣屑北鄰閭夫子尚忍資
盃啜得諸韓盧口實以彊暴劣作詩誇芳美此譽寧所
悅不如狐膏臊質賤甘棄絕冢妖老通數藤索夜空設
爾曾不及彼就獲徒內熱聆聲無聳耳當學縮頸鼈吾

君阜萬物沛若澤未竭誰能復古初此味儻可缺

和蘇翰林題李甲畫雁二首

畫寫物外形要物形不改詩傳畫外意貴有畫中態我
今豈見畫觀詩雁真在尚想高郵間湖寒沙璀璨冰霜
已凌厲藻荇良瑣碎衡陽渺何處中泚若煙海

蕭條新湖秋霜落洲渚潔蓮垂蘭杜死菖蒲見深節慘
澹沙礫姿清波侶羣鴨往時吳興守看畫憶苔雪為儀
尚不污孤高比雲月聞在雪堂時滿堂唯畫雪

秋竹

秋風多煩寃竹是歲寒物朝寒堦玲瓏莫寒堦卹勿翻
然下一葉未覺瘦齒岑豈無陳根旁寂莫衆頭屈何時
雷填填看爾射地出

郊居與八弟无斃讀書

坐狂得世捐作官故不了十年未弛負半世不黔竈居
然顏玉雪及是鬢蓬葆碧山已焚魚白水初種稻瓜區
可深隱圭竇便却埽之子懷世資行脩名譽好避人本

愉恬坐我亦枯槁

无斃以余故得監廟

頃求田野處政以城郭擾

常時啜此別幸爾晏言笑如蘭豈異臭覆瓿本均好

去聲

不懲范釜塵尚作韓編盜斲輪元戒疾紵絮非病少莞

爾勸之休怡然守而嫪翻思南遷久祗幸北歸早三已

令奚慍四至卿誠巧所欣顛木蘖莫羨姣人瞭同氣靡

間言它人闕忠告貧居無酒肉窮巷有探討葵作飽蓬

蓬茗澆憂悄悄長閒味更永競進念已勦目鴻天蒼蒼

夢蝶日杲杲蘅皋美新雨藜杖邈高蹈營齋直新徑創

檻俯幽沼架以我園檀茨之子官草

无數月給芻也

優游聊卒

歲邂逅可同調佩玉子終翔菟裘我方老囊中餐玉法
樞上追風驃能知面不覩未用心如攪平生夔契慕晚
歲瞿聃妙但欲入林深子來應問道

用无數八弟永城相迎韻寄懷

平生殫千金術似劉累僻春風九軌道無我迷陽跡呼
來著冠純野貌不改昔易衣憐介弟猶有布一尺身慙
崔浩短胸次儼列戟中天翥鸞鳳我自無六翮何曾容

權貴見謂貧盜壁堂堂涑水翁我在此人籍不詆曲江
賢寧羞九年謫艱難累吾母鬢髮白一夕獨此負吾心
敢言忠抱石方時半千運異昔陽九厄譬馳羊腸坂雙
任臣子責帝王所張弛乾坤有闔闢君敷皇極言人詠
蓼蕭澤鳶魚競飛躍風俗凜移易已開公府閭又置四
郊驛摻求逮田野欣喜到僮役雖微攜手上頗似破筴
釋川塗見吾弟薪木詢我宅憐君如我固不歎玄尚白
薄飲盡餘醅凝塵振鹿席我醉易成狂欲起須君掖

次韻答葉學古

昔我遊武林值子長江頭我時方南轅子亦將西舟相
見兩大笑典衣上高樓樓高不知暑五月凝清秋環觀
四山明俯視萬井稠喧喧市中人日莫歌吹浮忘形與
子飲一醉餘無謀湖上荷花生黃鸝飛柳洲翻然搖兩
槳下上逐輕鷗不覺脫塵世自謂逍遙遊晚訪城隅寺
竹林森如幃斫薪煮山茗瀟洒破百憂腳懶厭屢闌五
日成淹留肅肅太史家門闌間且幽荒亭蔭踈桐雀鬪

聞啾啁其人絕世賢
擲揄困時流唯我與
吾子大軸更往投
幸聞一諾榮不受萬
戶侯誰言王母桃
方朔不得偷未幾子
告別西賓帝王州
吳舩風雨夜送子不
勝愁八月子獻書高
談夏商周惜哉天下
馬驪牡煩推求我
濫鄉老薦麻衣望前
旒愧非鳴鳳祥斥去
還林丘三月我渡江
子行窮海陬相望遂
乖隔慨歎不自休
逆旅善辱人虛激韓
娥謳操瑟立齊門
乃反怨不收嗟哉子
與我不幸斯人儔
有客道閩吳書詩
眷綢繆開械恍自失

但覺膽氣道有如飲食泉海貨溢兩眸子詩益加富我
句猶能裒春禽與秋蟲引腹聊相酬

次韻蘇公和南新道中詩二首

山園芙蓉開寂寞歲云晚公來無與同念我百里遠寒
飈吟空林白日下重巘興盡還獨歸挑燈古囊滿

讀公棲鴉詩歲月傷晚晚公胡不念世蠟屐行避遠羈
鳥翔別林歸雲抱孤巘我才不及古歎息襟淚滿

感懷追和柳子厚郊居歲暮韻

殘暑夜如炊曉風吹蕭索開門望林木引蔓修籬落所
欣塵累遠不恨生涯薄心事少干雲白頭成憶昨

次韻閻甥伯溫池上八首

文饒論百揆豪氣闊天宇歸來坐平泉草木何足數只
今和文弟怪石幾風雨達生要忘累人取應我與

李和
文家

涼堂後石甚奇上刻平
泉字蓋文饒自題也

昔吾卜城東今吾卜城中祇畏盜賊迫安知塵市同畚
鍤運渤海操蛇應未窮無乃遭此笑君如北山翁

誅茅斬惡木衆卉方以明掘沙到沮洳方復見此澄客

來恍異境物象初不增以此自誑目果下能日棄

池深不可臨際水作石磴塵埃攪百里得此亦差勝晨

朝看雨坐蛙喜律呂應有兒不鼓篋共此踈嬾興

物養有得失瘠地江河隈亭檻但小草山林自奇材我

有八極興聊堪一席開長嘯本造適悲風為誰來

自從移居來城市益啾擾如何跬步近亦有鷺下沼謁

來欲騁鶩詰曲故百遶人間南柯夢方此猶復小

黃冠一奇士教我漱華池茅檐夕堅坐見月柳間低水
蟲時一出細浪作鱗差流觀起百慮內視失羣疑

平生惟親舊相得懷抱敞寧知老田里三徑得還往結
廬在人境此意陶令賞但話北牕涼何必羲皇上

次韻彥遠相州道中二首

自君之出矣吾居闕晝橫尚有楊李來時能出門迎少
日所忿惱壯年瞽雙睛涉月在一床幾成小冠盲夫子
竹林趨世固溷高明尚喜鞍馬間經阿復緣泓詩隨晚

雨墮迫戶有餘清
便擬釀白黍相邀
飭青精重惜吾楊
李祖秋各南征

朝入一几縱暮入一几橫
黃卷值昔人歡與相逢迎
孫子謝口語阮生勞目睛
登亦豈必暗籍猶未能盲學
非經世具所貴自知明
仁義有不然失時悲戰泓
一生屐幾量况欲竅河清
動與道彌遠靜於理逾精
君能問舍往吾亦賣刀行

永嘉縣君赴潁昌杜丈之喪送至鹿邑境上贈別

二十年糠粃相從無覩顏尊公抱至痛白玉掩深管送
子三百里西風涕洟瀾鄰喪罷相舂沉我五服間憐子
一女子忘身赴憂患但恨莫攀輶賤生守微官勿為搯
執悲我居不求安送死當大事丈夫良獨難

綴古詩語送无穀弟赴舉

鮮民之生靡瞻匪父母氏劬勞寧不我顧兄弟無遠惟
予與女執子之手此夕何夕我心蘊結兮嗟予弟行役
二之日栗烈飄風發發子之清揚麻衣如雪載馳載驅

出宿于干揆之以日體无咎言既差我馬遠送于野敦
彼獨宿于林之下無衣無褐不念昔者陟彼高岡或降
于阿瞻望弗及獨寐寤歌輾轉反側不平謂何顯允君
子洵美且異溫其如玉干祿豈弟春日載陽薇亦作止
覘皖黃鳥嚶其鳴矣

贈文潛甥楊克一學文與可畫竹求詩

與可畫竹時胸中有成竹經營似春雨滋長地中綠興
來雷出土萬籜起崖谷君今似與可神會久已熟吾觀

古管葛王霸在心曲遭時見毫髮便可驚世俗文章亦
技爾詎可枝葉續穿楊有先中未發猿擁木詞林君張
舅此理妙觀燭君從問輪扁何用知聖讀

補樂府三首

荳葉黃

蒹葭蒼荳葉黃南村不見岡北村十頃彊東家車滿箱
西家未上場荳葉黃野離離鼠窟之兔入畦豕母從豚
兒豕啼豚咿咿銜角復銜箕荳葉黃穀又熟翁媪衰舖

麩粥荳葉黃葉黃不獨荳白黍堪作酒瓠大棗紅皺荳
葉黃穰穰何膻膻腰鎌獨健婦大男往何許官家教弓
刀要汝殺賊去

漁家傲

漁家人言傲城市未曾到生理自江湖那知城市道晴
日七八船熙然在清川但見笑相屬不省歌何曲忽然
四散歸遠處滄洲微或云後車載藏去無復在至老不
曲躬羊裘行澤中

御街行

雙闕齊紫清。馳道直如線。煌煌塵內客相逢。不相見。上有高槐枝。下有清漣漪。朱欄夾兩邊。貴者中道馳。借問煌煌子。中道誰行此。且復就下論。驄馬知雜事。官卑有常度。那得行同路。相效良獨難。且復東西去。

雞肋集卷八

欽定四庫全書薈要卷一萬五千二百七十六

集部

雞肋集卷九

宋 晁補之 撰

古詩

和關彥遠秋風吹我衣

海中羣魚化黃雀林鳥移巢避歲惡鄴王城上秋風驚
昔時城中鄴王第只今蔓草無人行但見黃河咆哮奔
碣石秋風吹灘起沙礫翩翩動衣裳游子悲故鄉忽憶

若耶溪頭采薪鄭巨君南風溪頭曉北風溪頭昏一行
作吏此事便廢夢中葉落覺有歸意歸歟歸歟吾黨成
斐然君今生二毛我亦非少年胡為車如雞栖鄴城裏
朝風吹馬鬃暮風吹馬尾與人三歲居如何連屋似千
里我則不狂曾謂吾狂不吾知亦何傷安能戶三尺喙
家一吭人亦有言人各有志吞若雲夢者八九長劍耿
介倚天外有如陳仲舉庭宇亦不治吾乃今知貴不若
賤無憂富不若貧無求負日之燠吾重裘芹子之飫吾

食牛心戰故臞得道故肥吾封侯匹夫懷璧將誰尤歸
歟歸歟豈無揚雄宅一區舍前青山木扶疎舍後流水
有菰蒲今我不樂日月除尺則不足寸有餘七十二鑽
莫能免豫且無所可用乃有百歲樗龔生竟天天年非
吾徒

贈關澮關洺

君不見杜侯昔為歌行贈徐侯大兒色清澈小兒氣食
牛往有關尹官仕周其人有道其澤流會稽竹箭無名

久文采關侯二兒秀不然安取關尹後何用黃雀青鷄
蓬間飛長觜飽滿短觜饑何用城烏嗷嗷八九雛端坐
秦氏桂扶踈淵也詩足興功也禮足立三年不見冠岌
岌何用春耕投種歎粟粒功成裴氏九里溼君家會稽
山頭松樹清江楓乃翁行采薪所願溪上風男兒封侯
食肉勲業須少壯勿學乃翁呻吟蕭屑所願在溪上

贈王順之歌

王為邢和
叔所厚

王郎見若不勝衣眇然儒者未有奇我知王郎有奇處

議論濤海擊蛟螭由周而來逮五季故事本朝能盡知
不惟知之業有用斟酌成敗中無疑我聞昔時崔浩亦
復爾所懷百萬非熊羆人才如此後來少朝廷水鏡區
妍媸胡為五十尚塵土長翮似劍猶差池愀然對我數
白髮追風逐日無由羈三書自薦應不暇五府交辟終
何為邢侯胸中有王霸不但遊談漢終賈勇於吾道一
臂扶往不畏難憂助寡似聞詩有雲龍期云何計出柏
馬下豈非事君難進從古然不然富貴終在天堆金買

玉患無玉玉至自駭無因前君不見東秦逐守拙難似
木石當前以身抵接浙去齊未敢言退飛過宋聊堪比
神形自問還自答因拙得全方至此少狂干世等畫蛇
老罷食功同履豨向長畢事漸可涯彭澤棄官從此始
山林不著一物隨平生萬卷付羣兒收光牛背看屋壁
更不刮膜煩金鏡遭時有用君當起丹青宛轉麒麟裏
我行此計無贏輸世事從來奕棋耳

游栖霞寺呈提刑學士毅夫兄

飛樓壓城城跨野黃河逶迤避條華城南鳥道拱高巖
入谷車箱不容馬解鞍初步石苔青細泉鳴遶竹間亭
肩輿直上十八折維以采絲雙巨絙我行枉矢復虵蹙
三步一呼勞我僕前旌已作鶴穿雲後隊方如蟻綠木
千條倒澗淙大壑百丈層冰凍垂瀑無雲而雲蒼翠橫
無風而風飈飈聲崖窮東轉路忽平長楊老柏森成城
朱欄碧砌上窈冥蓮花三峯只對面仙人玉女如相迎
却臨北嶺望吾郭萬瓦一垓令人驚孔侯翛然顧我語

高真之居隔風雨下視人寰如此許此中豈但蠻觸微
千古紛爭幾是非我言人處世此見釋氏義人食地上
穀足固不離地我今正在阿堵中與君安得生兩翅却
憶隋文駕六龍意比姬滿朝河宗當時萬騎留山麓登
臨已卷長江東翠微宮裏亦如此依然古殿對喬松何
况山中攜妓裴御史猶唱當時霜月空與君江南厭山
水香鑪雙劍俱夢中異鄉同宦對絕景令我不指東飛
鴻立戒兵厨釀春酒要看雪盡山花紅不須墮淚似羊

守且可騎馬同山公

聽閻子常平戎操

嶧陽之孤梧踣自霹靂斧龍伏之靈林復古斷文橫截
絲百縷下垂七軫如牛乳上有明星稀可數當軒拂拭
待君鼓君心有在君未語仲尼昔時從師襄頎然一人
猶望羊我獨懷之千古長杖策不省頤之忘去年河決
瘡未補今年赤地無禾黍像龍焚炷亦何取堂上平戎
不敢聽且激南風召時雨

同楊希仲吳子進李希孝張景良北關納涼晚過
大安寺

君不見少陵翁昔時亦厭在泥滓青鞋布襪翁自喜上
關流水入城來青蘋之末風未已駕言出游我無酒張
侯為致尊中旨可憐築室窳封池下有千房并萬蕊官
曹十九民事聒况乃坐堂環榜捶揚波沐髮安在哉我
曹官冷奚不來日長飛鳥困塌翼龜出仰喙魚張腮南
箕不哆少女默焦喝坐恐昆蟲猜楊君嘗攬轡獨出無

把袂古藏大般若中天立華廈同游得吳李張子亦予
社登臨物色為我豪長空吹雨來蕭騷原為起伏河出

沒霧作吞吐山卑高君不見幕中羣公府曹掾清談接
武金閨彥平明趨府罷亭午寧有食頃坐間燕我曹放
意識崛奇王事鞅掌慙周詩嵇康不堪章服裹此事恐
得通人嗤李侯挽我未宜下世間一笑如此寡鄙夫敢
慕從事賢少日采薪勤兩肩草玄亦投閣醉者墜不愕
安能學丁君高舉似黃鶴一屨平生事百壺中慮廓且

當俛仰宇宙間子欲觀海須觀瀾所思安在良阻艱李
侯有嘉意語若繭緒曳不應開口煩睥睨愛身為物太
早計

同張子望顏伯儀上關納涼

高閣無風華屋熱正午四隣還往絕張侯不厭過市煩
呼我柳隄鳴躑躅城如蚪背卧透迤城上戍樓虬白鬢
一水貫來深宛轉萬家圍去綠參差囂塵塞眼邾能避
未暇解衣聊埽地可憐繫馬著垂楊可憐臺榭對池塘

無限芳洲生杜若芙蓉菡萏倚新粧鴛鴦相對鷓鴣舞

飛去黃鸝獨無語登槃未用伐蛟鼉苦菜黃瓜亦堪數

張侯河目須垂膺齒如明玉嚼寒冰未須坐上白羽扇

談言自足驅青蠅司業高情勿寂寞仲宣從軍良可樂

欲看詩句出嵌空更饒酒量開磅礴廣文顛顛獨何人

男兒三十四方身相逢得意吐然諾俸二百錢終不貧

野橋偃僂風吹髮徙倚門關臨滯嶮江湖平日憶蘇侯

更詠夕陽明觀闕

蘇文子由上闕詩云落日回看觀闕明

人語喧喧未聽

回木蘭晚放水萍開黃昏下馬天似漆急雨傾屋翻狂
雷

開梅山

開梅山梅山開自熙寧之五年其初連峰上參天巒崖
盤嶽閔羣巒南北之帝鑿混元此山不圯藏雲煙躋攀
鳥道出蒼蔚下視蛇脊相夤緣相夤緣窮南山南山石
室大如屋黃閔之記盤瓠行跡今依然高辛氏時北有
大戎寇國中下令購頭首妻以少女金盈斗遍國無人

有畜狗厥初得之病耳婦以盤覆瓠化而走堪嗟吳將
軍屈死狎狎口帝皇下令萬國同事成違信道不容竟
以女妻之狗乃負走逃中山崖幽絕不復人跡通帝
雖悲思深往求輒遇雨與風更為獨力之衣短後裾六
男六女相婚姻木皮草實五色文武溪赤髀皆子孫侏
離其聲異言語情黠貌癡喜安土自以吾父有功母帝
女凌夷夏商間稍稍病侵侮周宣昔中興方叔幾振旅
春秋絕筆逮戰國一負一勝安可數邇來梅山恃險阻

黃茅竹箭霏霧雨南人顛踣斃溪弩據關守隘類穴鼠
一夫當其阨萬衆莫能武欲知梅山開誰施神禹斧大
使身服儒賓客盈幕府檄傳徭初疑叩馬卒歡舞坦然
無障塞土石填溪渚伊川被髮祭一變卒為虜今雖關
梁通失制後誰禦開梅山開山易防獠難不如昔人閉
玉關

富春行贈范振

錢塘江北百里餘漲沙不復生菰蒲沙田老桑出葉麤

江潮打根根半枯八月九月秋風惡風高駕潮晚不落
鼓聲鼙鼙櫓咿喔爭湊富春城下泊君家茅屋並城樓
不出山行不記秋越舶吳帆亦何故今年明年來復去

胡戢秀才效歐陽公集古作琬琰堂

君不見廬陵公往為學士修書日詔畀千金訪遺逸遺
文逸字往往出故都易姓幾兵火量鬻鼎腹細詰誑道
人岫嶠空有聞丘陵仙鬼事恍惚共和十鼓記亡一嶧
山肉在無復骨雲陽八體又瓜剖至使漢童訛尉律世

儒詭正何足臧公家安取千軸藏仲尼猶及史之闕有

馬借人吾敢忘題籤甲乙潁水陽後來胡君癖膏肓傾

家自構琬琰堂摻羅近出補厥亡荒林圯冢見未嘗南

觀禹穴計渺茫閉門睥睨在一牀常恨平生好古家無

力騎馬蹊田觀斷刻中郎二字煩走驛率更三日勞野

食長年囊褚况易擲兒作募朱婦遮壁願從胡君丐無

有十百數中聊取仇胡君今逸民盱眙不見十五春坐

令鈇槩老壯士朝廷豈無憂國人曩時豪氣今誰在會

面只謀千日醉聽君汗漫馳古先世事無何付蟬蛻

和緡雲守關彥遠浮山作

在揚州城中提點刑獄之廨石色如鐵其高可

隱圖經謂之浮山

廣陵形勝昔所聞崑岡作軸江為門西來蜀道從萬里
伏堆藏阜爭崩奔盤挈蹙踏得江住精鐵一畝巋然存
半潛屋牖半出戶鼉龜見背熊羆蹲我行平地是絕頂
歎息但以指爪捫誰言一水限南北壅遏勢極逾騰騫
不然安得江南之山踴躍出中流浮玉猶昔萃操權高

視競瓜分島夷索虜何煩述木蘭水調更淒涼延和小
語尤倉猝周公卜雒貴坦平亦言有德易以興真人龍
飛狐兔窘御營周塹壓蕪城大明寺中老竹在九曲池
上新荷生君胡聞此不數往地中頑礦煩詡評自言家
世西湖側慣聞洗土開南屏欲空息壤發幽祕河曲定
笑勞精誠君不見珊瑚玲瓏石上吐海底有山那可覩
試院求李唐臣畫

有客攜來白團扇看君畫出翠微峯忽然陂水變陰霧

便有松林吹晚風
松林陂水靜何極
何處歸舟天際識
韋侯直幹儻不難
杜陵東絹郵能惜

黃河

黃河鬪小吳天漢
失龜鼈靈原潭下
藕爛死只有菖蒲
不生節白馬橋邊
迎送胡冀州斷道
無來車新隄築得
高嶺嶼舊隄杵聲
未可絕

酌李唐臣贈山水短軸

李為刑曹杜君章知賞

大山宮小山霍欲識
山高觀石腳大波為瀾
小波為淪

欲知水深觀水津營丘於此意獨親杜侯所與復有人
不見李侯今五載苦向營丘有餘態齊紈如雪吳刀裁
小毫束筍縑囊開經營初似雲煙合揮灑忽如風雨來
蒼梧泱泱天無日深巖老樹洪濤入榛林閣漠猿狖寒
苔蘚侵淫螺蚌溼紛紛禽散江干沙有風北來吹蕪葭
前洲後渚相隨没行子漁人歸徑失李侯此筆良已奇
我聞李侯家朔垂跨河而北寧有之曷不南遊觀禹穴
梅梁鏤澀萍滿皮神物變化當若斯元君畫史雖天與

我論絕藝無今古張顛草書要劒舞得意可無山水助
他日李侯人益慕

雞肋集卷九

欽定四庫全書薈要卷一萬五千二百七十七

集部

雞肋集卷十

宋 晁補之 撰

古詩

題惠崇畫四首

東風回江上渚何處來雙白鷺灼灼岸間桃依依蘭杜
苗一銜湍瀨鱗一下青林梢瀟湘綠水春迢迢

春

老柳無嘉色紅蕖羞脉脉宛在水中洲雙鷺羽蒼白何

須玩引頸顛倒寫經墨惟應一臨流當暑袵締夏

一雁孤風乍臨渚兩雁將飛未成舉三雁羣行依宿莽
蘆花已倒江上風雲間分飛那可同秋

天高靄靄雲昏江闊霏霏雪繁渚下鴨方遠泛枝間雀
不聞喧鄙夫此志相依生涯梯稗同微欲具沙邊短艇
波濤歲晚人稀冬

擬樂府十二辰歌

鼯鼠食牛牛不知牛不願駢而願犁虎噫來風皮見藉

兔狡宅月肩遭肺欲兆幽烽二龍死獨微晉澤一虵悲
失馬吉凶方聚門亡羊臧穀未宣分沐猴冠帶去始慙
木雞風雨漠何聞不須皎皎吠蜀狗阮子與豬同酒樽

二十八舍歌

戎菽有角原桑黃客愁唧嘖聞扈亢轉蓬無氏行役晚
蟋蟀在房思婦惋男兒有心事弧矢十年風光隨馬尾
長鬚舂米婢借箕斗酒為君聊解頤誰憐長夜飯牛苦
安能卧泣羞兒女

闕虛危
二句

平生未入君此室一廬脩然

四壁立文章奎躔動圓天貧有餘富黥婁賢功名不羞
爛羊胃滅昴擒胡未能計誰能簡畢老此生不用誣紫
招忿爭世事參商君此行桂酒椒漿石井美山鬼幽篁
衣薜荔暮江老柳繫歸舫蛟宮涵星動深淵張帆自慣
夕風恬九折摧輪鵠翼短他年君車當軫轉

行路難和鮮于大夫子駿

贈君珊瑚夜光之角枕玳瑁明月之雕床一繭秋蟬之
麗穀百和更生之寶香穠華紛紛白日暮紅顏寂寞無

留芳人生失意十八九君心美惡那能量願君虛懷廣
末照聽我一曲關山長不見班姬與陳后寧聞衰落尚
專房

跋遮曲

君不見魯中羣兒歌跋遮跋遮何語耶吳歛越吟
初不省恐自塞北傳鳴笳跋遮胡為樂且譁試歌河漲
水漸尖車河中耕泥春種麻麻生三歲不開花膏菱兩
角黑如鷓漁父笑且語誰能跋遮舞君不見前年大旱

河草黃草中魚子化飛蝗又不見往年大雨雨決渠渠
中朽瓜生老魚蝗飛食場穀擊鼓煩趨撲我家家具如
筍束今年梁山撓濁淤兒無鋤麻姑來漁荷鋤往賣鋤
買網空市無丁丁斲船斲屋櫨艇子如星喚施畧夜唱
跋遮曲羣鳴起白鳧

長安行贈郭法曹思聰

越羅作衫烏紗幘長安青雲少年客梁門門西狹斜陌
飛閣氤氳多第宅南威十五桃花色簫管哀吟動魂魄

銀槽壓酒傾琥珀青絲絡頭飛赭白黃狗蒼鷹快多獲
少年意氣區中窄金昆玉季盈十百君獨飄翩異風格
十歲鈇丹事書冊豈徒新豐困寒阨能犯龍頭請恩澤
送君此行無愴惻努力功名傳烜赫它年尋我吳山側

躑躅盈山禽磔磔

郭雅好山水
嘗約遊吳

悲來行哭石起職方

悲來乎石君吾何悲夫斯人婉兮河之津厖眉白面照
青春朱紱斯煌映路塵翩翩者驥銀鞍新東來奇意安

所伸大野既瀦唯赤墳穀垂穎麻敷芬亡逋來復瓦鱗
鱗高堂擊鮮會衆賓賓起舞君欣欣何人未至居客右
西郭之一儒迂且貧迂且貧自隗始能招劇辛致樂毅
四方遊士爭來奔戶內光儀亦可論大息拖縉紳中息
氣氤氳小息秀眉目天上青秋雲朱旗畫舸長隄曲去
時簫鼓黃塵覆無復當年子產歸至今人作嬰兒哭西
郭之一儒無事門生苔久雨足不行官街常時門前車
馬客舊雨自來新不來聽我陳張叔卿孔巢父皆隱淪

無人汲引長飢辛日午不出開衡門前侯後相安敢論
憂殺口間縱理紋長慟吾邦對遺跡耿耿一心誰我識
徐君已死劔不忘心已許君那復惜

鸞車引

詠史

推鸞車伐鼉鼓從帝子迎天女天女喜立龍旂馮小寶
光陸離雲斑斑覆銅山新城鳴鳩如乳烏飛來為爾棲
青梧控鶴府令雲衣裾僕射竄死令公誅婦懼兒無呼
兒呼驚且吁宜都內人立次且手擎何物金唾壺請為

金方口人卷十
大家畫長圖徐公子譁且止卿無來明堂屢舞覆龍盃
覆杯之傍戲大鼠卿欲投之梁公懼

贈戴嗣良歌時罷洪府監兵過廣陵為東坡公出
所獲西夏刀劍東坡公命作

三郎少日如乳虎代父搏賊驚山東硬弓長箭取官職
自說九戰皆先鋒將軍拳勇饋不繼痛惜靈武奇謀空
城頭擲掄下俛走壯士志屈羞填胸平生山西踏霜雪
洪府下溼號兒童聞名未識二十載初見長揖東坡公

銳頭短後凜八尺氣似飲井垂檐虹只令不語當陣立
望見已是千夫雄往年身奪五刀劍名玉所擐犀札同
晨朝攜來一府看竊指私語驚庭中紅粧擁坐花照酒
青萍拔鞘堂生風螺旋鏗鏑波起脊白蛟雙挾三蒼龍
試人一縷立褫魄戲客三招森動容東坡喜為出好礪
洮鴨綠石如堅銅收藏入匣人意定蛾眉稍進琉璃鍾
太平君子尚小怯戒懼邾小母葍蜂舞干兩階庶可覩
跳空七劍今何庸我為蘇公起揚解雅歌緩帶聊堪同

從公請礪歸作硯聞公嘗諫求邊功

秋夜古風

瑤池始波縣圃風
鄧林飛葉雲攬空
人間櫟社幾黃落
曉牕洗黛悲青銅
常嗟彭祖悔杖晚
不見王母桃花紅
安知帝怒削龍伯
輿嶠已沒歸墟中
楚人方復感時節
申旦不寐同秋蟲
虛堂氣入枕簟肅
熟寐不復聞噦噦
大言身塞不得仰
了語無異鴻毛烘
天如旋磨人蟻却
更千萬日勞何功
漢南種柳人笑爾
江潭悽愴彫形容

小樓遐觀午夜闌涼月不盡山無窮一身逆旅過萬物
千古昨夢如驚蓬胡牀收慮斲一息杲杲已上扶桑東
茗雲行和於潛令毛國華

茗溪清雪溪綠溪水灣環繞天目山間古邑三百家日
出隔溪聞打衙長官長髯帽烏紗不曾執板謁大尹醉
卧紫蘭花影斜紫蘭花開為誰好年年歲歲溪南道不
見西陵白髮人荆江夜雪唱陽春陽春絕唱和者寡客
醉聞之雙淚灑夜來魂夢海中山縹緲雲濤煙浪間雲

金
卷十
濤煙浪不可渡睡覺秋風落桐樹秦吉了秦吉了言語
無人會無人會得奈君何且向紫蘭花下醉

冤胸路

棠梨葉戰風騷騷紙錢窸窣鳴空郊背人獨鳥歸寒巢
予亦投村指橫橋茅檐霜月照征袍夜冷不寐聞狐嗥
悼我為生良已勞兩手如龜髀肉消青樓公子燒蘭膏
雪壓屋倒飲方豪睡覺三竿紅日高

芳儀怨

事見虜
廷雜記

金陵宮殿春霏微江南花發鷓鴣飛風流國主家千口
十五吹簫粉黛稀滿堂侍酒皆詞客拭汗爭看平叔白
後庭一曲時事新揮淚臨江悲去國令公獻籍朝未央
敕書築第優降王魏俘曾不輸織室供奉一官奔武彊
秦淮潮水鍾山樹塞北江南易懷土雙燕清秋夢柏梁
吹落天涯猶並羽相隨未是斷腸悲黃河應有却還時
寧知翻手明朝事咫尺人生不可期蒼黃三鼓滹池岸
良人白馬今誰見國亡家破一身存薄命如雲信流轉

芳儀加我名字新教歌遣舞不由人採珠拾翠衣裳好
深紅退盡驚烽塵陰山射虎邊風急嘈雜琵琶酒闌泣
無言徧數天河星只有南箕近鄉邑當時千指渡江來
同苦不知身獨哀中原骨肉又零落寄詩黃鵠何當回
生男自有四方志女子那知出門事君不見李君椎髻
泣窮年丈夫飄泊猶堪憐

五丈渠

五丈渠河水齧堤三里餘懸流下噴水渤滴訛言相驚

有怪物灤東漁子浮兩舫清晨徑流雙鬣搖驚人跳起
橫觸島大鱗十尺長天矯殺之信宿不敢言並村稍稍
聞者誼伐鱗封肉擔揭去兩日一村猫犬飫夜來水泛
州西原青青百頃白波翻里巫推變咎漁子豫且賊神
實為此此邦一年不穀食賣魚取錢當常職聞道相家
口津人無敢憑大魚死小魚靈

賈碩秀才得兩圭有邸

混沌既鑿元氣痛鴻源滔天堯曰吁羽淵之化三足逋

玄圭告功聞禹書姚虞班器奔九區塗山合瑞羣辟趨
三腴肆伐夏寶俘下逮血祭仍鬻辜饗有明德繫玉如
霍山屬之醫無閭裂崖剖璞陳璠璣追琢出美山為虛
兩圭禮地四望俱寸尺可識形可圖緡城之西物色古
霹靂野火燒牆堵大氓築室動千杵奔泉啓鍤幽奇覩
陰溪埋冰剝寒土濃氛却掃孤月吐森然睟立疑未舉
熒熒幽光射敗筥鄰人進說田父怖張伯不敢私自取
初來畫地為予語卽圓中規圭合矩瓌奇未可一二數

羸顛劉蹶分莽鹵禮嚴登降謹仰俯牲玉不加隨豆簋
餼羊之存良小補此寶豈徒周石鼓鄴城尺鐵尚可神
老蚪躍水生雷雨

閻子常攜琴入村

閻夫子通古今家徒四壁猶一琴今年二月雨霖霖喜
君壠麥如人深屋間幽默咸池音高山流水我非聽聽
我說君辛苦吟薛老村西十里地旱日燎原無柳林芒
鞋曳杖逐鎌籠當午未食飢燒心芸芸麥田翻黃波蝻

金
夕
日
人
卷
十
十
盡盤穗如蝸螺麥未收打催種豆屋下跡少田間多閤
夫子時我過我與夫子良同科四體雖勤口舖衆煮豆
然箕窮奈何人謂君琴語辛苦此曲無乃傷天和君不
見夫子宋園不糝猶弦歌

贈余樗年試院作

平生車軌周四方結交童齒老相忘異哉余子久彌芳
吳人猶記稱周郎河豚入網荻芽長宜興罨畫煙水蒼
風雩春服真少狂不愧戴崇升後堂

時王平父方教授
毘陵樗年所最厚

也橫戈筆陳倒千槍叔鸞獨步禹出羌

樗年奏藝開封第一故云

世

儒膠擾何足臧說食不救饑求糧瞥思振衣千仞岡空
林無人一繩床五車純束不在旁欲徹梯磴排空驤鍾
山春水繞城隍從師不憚白笈裝矢鋒相觸塵不揚驪
黃牡牝若滅亡子嚴主簿志不償厭見朱墨紛僮囊西
風雲日思帝鄉東華拜勅鳧綴行黃昏閭闔飛驪驕虛
堂節候變金商閉門蟋蟀鳴我房吾君仁聖周成王屏
驅虎豹開明光山龍粉米雜青黃多儒可贊至治香園

檀山石豈荒涼潢汙蒞藻須豆觴願君與借羽翮翔賢
書蠶列升未央君如病鶻待秋霜牛衣未可悲王章公
朝道闢五達莊服褰按節緩勿忙夢松生腹渠不祥莫
車上僂應循牆功成歸飲沆瀣漿發機要若黃間張

次韻都尉王晉卿天駟監邂逅作兼呈坐客

平生杜元凱學問光奕世咸聯帝室未要論烜赫功高
羊叔子赤霄翔舞須威蕤孔翠文章豈其累崇臺作山
池作湖富貴所要聲名俱酒樽詩句得過薄小隱山城

殊未踈曹侯詞翰諸公客慣聽清歌耳傾側天閑兩驥
看追風晴軒忽下飲河虹拳毛妙畫不可見顏公筆精
如對面鄧張不醉無攬轡燒燭林間鵲飛起第語曹侯
繼張燕鄰榼如澗不憂淺

雞肋集卷十

欽定四庫全書薈要卷一萬五千二百七十八

集部

雞肋集卷十一

宋 晁補之 撰

古詩

鄧御夫秀才為窟室戲題

君不學馮驩彈鋏從薛公
貸錢燒券悅市傭
又不學魯連約矢射聊城
笑夸田單取美名
何為空郊獨坐一茅屋
深如魚潛遠蛇伏
荒檐野蔓幽莫矚
窺戶下投如墜

谷其外桑麻雜蔬菽白水寒山秀川陸秋風蕭蕭吹苜
蓿晚日牛羊依雁鷺朱書細字傳老子蠹穴蝸穿無卷
軸我來不暇問出處但愛君居伯夷築九月九日秋氣
涼芙蓉黃菊天未霜登高能賦豈我長從君此庵時相
羊不用糟丘譏腐腸酒酣猶能歌楚狂我敬先生不敢
量二三子者亦自彊潔身亂倫非所望

揚州被召著作佐郎自金山回阻冰效退之陸渾

山火句法

二年官揚猶一炊丞聲毋害守不譏帝知無功呼返之
具舟從江民不知道傍愚叟為涕洟豈無愛人如爾為

我謝叟歸視汝兒風號鴻潦水涸陂冰塞川船不可移
白蜺橫野光逶迤寒威上射小日規旦行一里方午維
十日繫野兒啼饑中無載盜過不窺官令十夫為操椎
耶許相力哀復疲我笑遣夫是安施霜不殺草聖所歎
歲十一月冰固宜逆天進亦不可幾為兒搏飴兒安嬉
寧三月暖猶流澌

澶守諫議韓琦禱雨有應

長蜺飲井井欲乾
白鼉鳴窟淒風寒
公馬未駕陰漫漫
公歸溼幙濡旌幡
霜刀不染鷲頸殷
塗龍安享雩舞閒
隰桑有沃柔可攀
小麥青青大麥攢
拜公起舞公顏歡
明日空堦響夜闌
屋漏不復愁衣單
幘幪廣廈安如山

依韻和子充雜言

君不見東方朔避世金馬門
侏儒倡郭同陸沈滑稽突
梯意已深不如孫登閉口逃
蘇門身猶孤鳳無與隣心

知嵇生未識真兒童讀書聞入孝遭時有用可以移於
君孔子繫易辭尊乾而卑坤耦耕未足問禮則鳥獸固
自羣荆榛孟嘗聲勢一旦消歇冢上之牧良可悲苟為
貧賤不濟物身死泯然俱若茲聞君早慕棲竹林何忽
作此悲來吟嚴君肥遯業討論少年宜自有異聞窮達
俱性外學者所不陳惟勿枉道寧屈身豈欲行不由徑
如滅明不然不欲乞醯於隣同微生白駒雖潔空谷難
久將誰親當時一篇差可人秋蘭薜蘿蕪亭下生亦蕃夫

人自有美子何足言採擷但慰吾愁魂吟詩作賦北牕
詞更妍萬言不直一杯何足憐咿叻聊用窮吾年能來
西疇清坐一榻橫長饑亦不輟釜云無羨荀卿論義榮
逕庭大不近人情是非亦置之古人踽踽涼涼生何為
揚雄擇中庸反騷痛湘纍我今不見雄此心猶為君子
夷世間趣舍不同豈但羊棗鱠陶潛自謂結廬人世無
車馬喧心遠能爾安有鄭君其門如市亦能自謂我心
如水

徑山

盤崖繞壑步步高僕痛馬乏游人勞五峯崛起干雲霄
衆山奔走爭來朝我行直欲犯星杓意徹絕頂繞山腰
松間鳥語如我招仰見白塔當林梢檐攜上下若桔槔
路窮飛樓鬱岩堯欽翁未來蔽菅茅山精木怪謹游遨
磨馳虺竄狂鼯跳靈景晦昧何由昭忽然飛錫從江皋
窮探不憚東峯遙曲腰丈人白絲袍再拜辭前風電飄
三百年來響鍾鏡閩商海賈輸金刀直欄橫牖山周遭

晨叅夜諷聲嘈嘈碧杉紫柏羅旌旄客來六月忘炎歊
明月庵前醉松醪白雲峯頂瞰吳郊鷲毛一點錢塘潮
錢王宮闕如累樵臨之股慄精魄超歸不得寐心搖搖
含輝孤亭立嶢嶠此地覽景尤難逃五更月落禽嘲嘲
陽烏欲上海水燒晦明變化不終朝倏陰忽晴狀莫描
夜闌燈青雨飄蕭偶坐兩客論幻泡探玄窮妙窺寂寥
破除世事無絲毫不奈詩思猶彊豪歸時日沒紅霞消
荒崖老木山蟬號

次韻太學宋學正遐叔考試小疾見寄

蕭然如裴叔則類毛疎復長邈然如王夷甫高致宜廟
廊功名四皓雲泉外詩賦三閭草木香君莫誇熙寧登
科面玉雪只今未老鬢髮蒼不應彈琴酒鑪坐消渴還
有禪病縛不忘相拋白社一歲長浮我杜舉須十觴結
交齊東李文叔自倚筆力窺班揚談經如市費雌黃冰
炭何用置我腸勝遊獨不思迎祥漾舟荷渚水中央

淮壖

淮壖日沒風卷沙黃昏飛雪如落花孤舟有客寒不飲
欵枕闌篷夜憶家雪飛篷底灑我額篷隙虛明來曉色
紙屏布被風颼颼驚起開篷滿舩白舩頭雪重折黃蘆
下有宿雁驚相呼天寒四野無行客凍卧孤舟愁盜賊
厭聞淮浪打舩聲原上風號天正黑土膏已動春陽來
安得長風掃霧開豁然天外見白日為君挂席凌清淮

寄懷壽光主簿四叔父

我初就學首未冠叔父不以童兒看我今生年二十一

叔父晚作東州官側身西望不得見淚下兩臉何汎瀾
青春白日不照貧士屋使我四壁長年寒六年兩歲從
進士晚學揚雄識難字貸錢乞米出都門鼓腹吹篪入
吳市讀書擊劍老死終何為古來慷慨無人知上有九
重之青天下有百尺之黃泥收聲蔽熱等雷火白楊蔓
草秋風悲生亦不可料死亦不可量荆山長號刖兩足
何如船尾歌滄浪我不能鉤章抉句攀俊造又不能赤
雞白狗追年少矯首翻腸無一言歸去吳淞學漁釣主

簿卑官何所施秋來兩鬢應生絲阿宜已冠無成事猶
憶它年冬至詩

收麥呈王松齡秀才

晁莊寂寞依東山王莊負郭容往還東山刺薊深一尺
負郭家近饒盤餐穿鞋戴笠隨麥隴早日炎炎煙燎顏
賤貧辛苦事當爾君屋鱗鱗三百間

花林示楊彭年秀才

花林遠望春陽浮卒然相值東山頭犢兒初乳毛物潤

鷓子欲哺鳴聲柔
一生會合盡天幸
萬事反覆非人謀
倒頭且擬醉千日
相如渴病乾咽喉

莎雞食蝗

居貧得田不百畝
天賜時雨苗氤氳
遲明當熟晚未刈
災蝗夜至如驚軍
秋風吟茅雨洗瓦
葉上穗落青紛紛
常嫌莎雞聒麥壠
紡車細掉喧晨昏
莎雞可憐爾叨利
驅蝗逐蝻羣披分
豈惟秋蟬畏螳斧
蝗亦為爾森跳奔
天下災蝗凡幾郡
安得爾輩盈千羣
揚眉振羽如屯雲

爾雖彊聒誰煩聞

題李偁推官頤齋

無捨靈龜觀朶頤自求口實君自知誰為此者君名之
其說不煩求我詩君家嚴君業夔伊虎視眈眈雄四夷
四方是維天子毘汶陽一室大澤陂我往受業拜門垂
聞公一語洗然竒我歸瞠若安可追君才固是麒麟兒
幼讀父書壯恩施不卑小官乃吾師况有內樂潛天倪
荒城無人誰過之面城築室茲逶迤去年秋雨河股移

百草不生苔擁基蟻子緣礎螾糞泥夜眠不穩憂為池
今年閏早春氣遲牆根隙地稍可埤初植防風種黃耆
萊州石鼎青琉璃地鑪宿火風鳴枝對君長語清未疲
外輕內順生理宜問從何得聊我治平睂州夫子言可
規麻田處士術安期今之崇丘歷九疑見人不語下臂
馳遁逃乎陰食蛤梨君何僮囊不往隨與訪汗漫還無
時還無時我何適北山之南南山北

答趙滋主簿

我昔尋幽徑山上曾傍茗溪弄菱漿南臨天目指掌間
隔嶺如聞笑言響年來清血斷征衣碧髮丹顏日夕非
便欲相期煮白石與君晚入煙霞飛

飲城西贈金鄉宰韓宗恕

大夫盤中定州盞三舉檐花舞凌亂請君行盞且莫稽
為君起賦飲城西城西古道如澗深東風吹沙不見林
虛堂更覺野原闊榆柳浩浩波濤吟雜花一園來遠道
兩株江南梅更好櫻桃已晚猶爛漫百株如雪聊可繞

常時東風無此寒常時諸君無此閒且看瓶口似魚貫
莫惜面文如纈斑大夫工為宋玉賦思不能涯字無數
秀才酷類東野貧白屋青山愁曲身籍咸不肯羞北阮
主簿高材即仇覽成詩午景已妍和罷酒花開應更多
山翁歸不醉當奈峴山何

答陳履常秀才謔贈

驅車觸熱中煩滿苦無蔗漿凍金盃陳君詩卷可洗心
持作終朝晤言伴男兒三十四方身布衣不化京洛塵

白駒皎皎在空谷黃鳥覯覯鳴青春子桑之居十日雨
入門不復聞人語形骸正是吹一呷安用虛名齊后土
文章初不用意成黼黻帝躬臨下民時花俚服誚新巧
牛馬安所辭吾名禹穴幽奇行可彊江北江南正相望
蔡濤鼓枻何當往愛惜水仙桃竹杖不應玉女三年留
相見還須未白頭蘧生知非苦不早巨壑夜半遺藏舟
達人一言嚙矢疾相從琢磨悔去日菖蒲正是可憐花
我獨聞名不曾識

和王仲甫病暑

吳邦憚暑如蜂蠆河曲還遭長日曬
蔗漿金盃賴蠲煩
內託潛陰數為敗黃昏乍快風吹髮
驅拊蚊虻坐明發
青衫主簿氣如雲茂陵無事悲消渴
望洋河伯何為者
兩涘無因辨牛馬何生狂夢涸歸墟
喉舌湯湯未勞瀉
能來一嗽華池津七椀清風立有神
更尋齒下微妙訣
遣君體適仍魂平案頭白紙如堆雪
人事紛紛日將月
與君未遇尤四時利害相磨生內熱

贈送澶州監酒稅劉銓殿直

頓丘淇水雄朔方官收權算資公藏晨朝百販羅庭堂
望門逆鼻聞椒漿惜哉劉子氣方剛峩冠凜凜頰而揚
丈夫有志固難量短袖不足供徜徉黃河七月鳴浮梁
風埃瘦馬景山長劉子何之魏北鄉悲歌彈鋏邀孟嘗
馮驩一語驚齊王况如劉子足自彊讀書滿腹鉗爾吭
鄴城埋寶夜則光士惟不用久乃彰不見將軍家平陽
遭時有用名焜煌

和顏隨飲酒

樊山夜漲河鳴鼓奎火占中知溽暑顏闔居鄰胡子都
共喜夏麋登宴俎叅軍河北主簿南騎馬相逢不相語
市西老屋斷人居自覺天風生廣宇青菅席坐土階溼
黃綆汲泉塼井古翩翩後至王將軍開口相投律呼呂
丈夫得意吐然諾盃酒形骸安足數露頂張顛且勿憤
起舞我能先衆客二豪禮法空是非一斗三盃眼方白
中虛嘔冷腹橫絇汗如槁壤朝陽蒸沸然煩厭暫莫遏

飲蛇不省疑吞繩豨苓卷桂導停飲兩日不咀公厨冰
長篇忽聽鳳凰曲却似半嶺逢孫登君家鐺勺還應洗
須我下床仍食美西池何似漢江長誰使蒲萄變新泚
醉捉蟹螯擘五指吏部拍浮非在水抱琴寧復待招邀
昨夜雨涼孤興起金丹定有換腸藥不用俗醫論表裏

壓沙觀梨

鄴城傍缺通清溝城南之水城中流白沙漲陸最宜果
萬梨壓樹當高秋去年花開往獨晚不見瓊苞腸欲斷

隆冬騎馬傍高原却恨枯枝寒日短忽然變化何處來
一夜東風吹雪滿晴川極望百晦開三山銀闕正崔嵬
雜花不容一朶間照眼冷艷雲為堆堂中置酒對已好
千葩萬蕊誰能繞暝景氤氳一片忙蝴蝶飛來落青草
人間浩蕩看春光豈徒田獵心發狂向人慘澹迫歸興
落日峴山催羽觴故園桃李春蹊沒惜哉拔去無奇術
明日重尋儻可期暴雨流堦不能出

過金堤劉景文

雲間高堞如雲白草下深濠如草碧迤隴斷出平堤
前見黃河如帶直官居乃在城西原荒臺古木烏鳥翻
美人芳氣如秋菊坐令暉暉棄中園不憂泐澤豪不殺
夜識漢中龜鼈在借須走馬候水曹後時此會何由再
霸陵往來初避名執賈不回人更驚無心躑躅路寢養
服車安用仍一鳴未若捧嬰何不可二豪螟蛉與螺贏
况聞舉案良亦賢那愛五花論酒錢不然僚慄坐歲晚
風入衰柳催寒蟬我論李君其趨獨自喻愚公徙王屋

是中聊可外形骸官閒方轡相與來

渤海河源
見山海經

送趙燮

趙侯慷慨諸公客少日論兵今髮白自言頗似講上鷹
老得一州聊鍛翮送行誰復雙眼青斷腸紅頰傾淥醑
停歌自解水蒼佩醉騎紫燕黃河冰

送石梁赴舉

鶴知半夜雞知旦歲晚淹留客心亂功名識時貴及早
不忍飭牛衣至斲家居負米有季弟能視明星弋鳧雁


男兒業就可以行桃李榮時腰綬燦

雞肋集卷十一

謹案卷十一第十頁前四行望洋河伯何為者刊
本望作茫據宋詩鈔改

第十頁後五行悲歌彈鉄邀孟嘗刊本嘗訛常今
改





總校官庶吉士臣張能照

校對官編修臣方燁

謄錄監生臣倪時慶